

古直先生文集卷之十四

誌銘

明故太僕寺丞王公墓誌銘

嗚呼予與子與天順初同事 今上皇帝

今二十餘年矣何忍執筆而銘子與邪子與邪子與邪

養其號自上世以來為東阿派姓曾大父諱亨大父

諱克讓考諱禮贈太僕寺主簿妣某氏贈孺人繼孔

氏封孺人正統丁卯子與以邑庠生升上舍不數月

選陞鴻臚序班既三載得勅進階登仕佐郎景泰庚

午以憂去比復任齋 詔于北畿諸郡凡有餽者悉



卻不受天順改元 吳廟後辟 皇儲復建有 旨

東人物丰偉端慎小心者俾爲宮僚與濟伯楊公善

首薦子與轉通事令人賜絲段表裏詞是遇千秋冬

至元旦三節於 文華殿舉案行禮尺寸不爽未幾

陞鴻臚主簿仍兼前職今上即位覃恩陞太僕主簿

三載賜 勅褒嘉子與彈心職務能聲大流先是太

僕卿張公鑑今楊公穆皆有薦狀在天曹成化丁酉

九載績成肆有奇丞之擢適邊報屢至需調良馬奉

命星馳于河朔山東諸邑揀督甚急雖馬數充物而

子與疾作矣卒於臨清而政之行司實是歲七月也

距其生則永樂庚寅五月得壽六十有八配趙氏封

孺人先卒子四長翰翰粟得七品散官次幹增廣生

次供次其尚幼孫女二卜明年二月葬舊縣驛之原

啓趙孺人之窆而合焉惟子與質幹魁桐器量有容

通經書累科不偶家素饒賁賙人之貧瘡人之疾成

人之婚姻有德於鄉人者多矣數十年元氣同處凡

有借貸者必以讓曰勿多取息教諸子以仁厚忠孝

爲勉以佻倖悖戾爲戒居官歷鴻臚太僕詹事三署

所至得上下心事無留滯而今已矣惜哉爲之銘曰
生也逢時未竟厥施我銘子與名其在茲

贈兵部車駕員外郎督公墓誌銘

贈兵部車駕員外郎督公卒餘二十載其配孫氏沒將合塋子職方郎中誠乃乞銘以掩諸幽蓋先是以事失而今始成之也某爲太史因其請安得而辭公諱某字某世爲東萊高密人唐宋以來代有顯者譜牒以兵燹失無徵曾祖諱慶祖仁美皆不仕然積行累仁遠近咸知之公生而坦直朴素有古風不喜紛華輕財好施捨貧未娶喪未舉者助濟之未嘗有德色事其親以孝聞宗族鄉黨交口稱譽無間言永樂間白賊作亂時有宿怨者輒乘隙報復之真偽固所

別公毅然不平遂偕同輩數十即公園之之間者懾伏而安全者亦甚衆至今藉藉人口嘗曰吾於子孫無所遺但遺利在人後世必有昌者初娶姜氏而孫氏者其繼同邑處士孫楚女封太安人再封太宜人性格重聰慧善女工少爲父母鍾愛之不許凡子既適公勤恪節儉紡織無虛日浣濯補綴之衣每服之不少厭待奴僕未嘗有厲聲或微過必爲掩覆之不使無措其寬厚如此以其夫既沒而惟恐其墜厥家乃拳拳教其子以明經取高科大督氏之族世稱佳助不於宜人安歸子男二長即誠已互進

士授兵部武選主事陞車駕員外郎今職方郎中次
曰實義官皆太宜人出女一前姜氏出孫男五曰可
繼曰某曰某皆幼女五皆在室銘曰 惟公挺生于
彼東萊宛有古風秉德不回厥配惟良克昌後來是
宜其生之也榮沒之也哀寵揚 宸翰 恩被泉臺
嗚呼若公幾何人哉

致政南京禮部尚書贈太子少保謚文僖倪先

生墓誌銘

成化己亥三月十八日先生卒于金陵之正寢適家
嗣侍讀岳歸省侍側既奉含歛如禮訖亟走京師以

言聞且言臣先尚書遭際勞效乞如例贈謚以慰泉
下 詔特允之贈太子少保謚文僖復遣官諭祭命
有司營墓事爰是春我文之士死日嘆曰先生一代文
人可惜可惜率緘詞致奠岳奉南京少宗伯李立之
狀徵銘于墓中序曰先生諱謙字克讓靜存其號也
正統戊午以應天府學生中鄉試明年中會試 殿
試中第一甲第三名授翰林院編脩時甲子歲早奉
命函香禱于北岳祭畢兩大降刻記于祠己巳九載
考滿晉侍講復奉 命使朝鮮與王國館伴倡和詩
什甚富景泰壬申入侍 經筵未幾改左春坊左中

允兼侍講又召入直 文華殿應制稱 旨晉侍

講學士仍兼中允甲戌充廷試讀卷官丙子修寰宇

通志成晉左春坊太學士兼侍講天順改元 英廟

復辟改通政司左參議仍兼侍講遣祭遼荆楚府先

王回晉學士戊寅 今上復東宮位出閣進學士先生

講讀于左春坊有大學諸直解已卯先生為順天府

鄉試主考時勢家子弟不獲俸進誣以他事謫戍

開平甲申 今上皇帝嗣位覃 恩宥回值外艱守

制于家成化改元 上念先生春坊舊人復學士職

尋入史館修 英廟實錄是年上疏乞改南京頒行

晉禮部右侍郎復乞休致不已 上憫其誠允

及岳以秩滿誥晉先生階正議大夫資治尹起為

京禮部右侍郎丙申晉 聖節表陞見 上眷注有

加賜緋衣金帶既歸晉本部尚書先是先生以體豐

得風疾至是增劇復言臣疾殆不起不敢妨大臣位

許之厥既得請卧病于家幾一年醫瘳弗效一日呼

岳曰啓予手予足視之予全歸無愧矣若等勉解毋

孤予地下之望言畢瞑目距其生則永樂乙未十二

月一日春秋六十有五葬江寧縣新亭之原先生先

世本汴人有仕宋者隨高宗南渡家浙之錢唐高祖

諱胤肇啟慶源曾祖諱啓畜德弗施 國朝洪武初
徙實京師遂占籍應天府上元縣祖諱德潤考諱子
安皆稱善人長者以先生貴累贈資善大夫南京禮
部尚書祖妣孫妣屠繼孫俱贈夫人配姚繼郭亦俱
贈夫人側室崔黃子男四長即岳姚出登進士累今
官父子同仕翰林自先生始體豐如先生而脩長過
之為詩若文無忝家法次阜郭出已中京闈鄉試次
出黃出次澤崔出女一適舉人楊時敷孫男二嗚呼
某從先生後幾三十年每得雄文大作未嘗不再四
嘆羨以為不可及蓋其平日於書無所不讀而造詣

精深故形於制作自然成章四方有求者揮筆立就
人莫能攖其鋒一時文名先生為重且天性孝友襟
度坦夷自筮仕以至蓋棺顯庸不一中罹誣毀卒無
怨言君子曰犯而不校先生有之然其初生也即異
雙目如電體有四乳八九歲時日記千萬言手所鈔
錄終身不忘時稱奇童故其終之所就如此惜其久
處翰林未獲柄用晚陞宗伯所司者不過禮文天下
之人徒知先生之文而不知其有經濟之才也所著
有遼海編上谷稿玉堂前後稿崑山稿南宮稿各若
千卷藏于家銘曰 天生異表世號奇童實人之英

兮佩孝服友稽古驗今咀理之深兮鞭撻其神江河
其思其疇若類兮珠玉其什雲漢其章其作之良兮
一策逸衆首甲探花瑞邦家兮玉堂彤管衮衮銑誅
直筆不渝兮青錢之選 青宮之輔與秩之信步兮
經帙說書京闈主文維正之章遵兮截截讒夫造誣
造愆命則然兮如鑑之垢如日之蝕終則白兮 綸
音載徵儀曹載履吾何怯于彼兮著述孔富名譽孔
播時何多于我兮階已峻而澤未敷而惜用之遲兮
亦既辭祿亦既不祿嗟去之速兮 錫紕及勅賚緋
與金生豐沐恩兮加贈及謚 御葬與祭沒實無愧

今於神也上征昭為文星於惟先也
下藏百葉不忘兮

大明資德大夫正治上卿南京致仕兵部尚書

兼大理寺卿贈太子少保謚襄毅程公墓誌銘

成化己亥秋九月二十有七日南京致仕兵部尚書

兼大理寺卿休寧程公卒于正寢有司以訃聞 詔

贈太子少保謚襄毅遣官諭祭營葬朝紳咸曰公一

代人豪而今已矣可惜雖然朝廷于其生加以空秩

于其休褒以重書于其沒優以卹典且有象賢之子

昌大其業是公雖死猶不死可謂無遺憾矣既而其

子敏政慟謂子曰先生父先君子三十餘年僕又曾
聆先生一日之教茲墓中誌銘敢以爲托乃誌曰公
諱信字考實其先聞臣大儒載在簡冊可考至諱社
者仕宋爲徽之休寧尉子孫因家焉高祖諱社仕元
爲承奉班都知曾祖諱長吉妣吳氏祖諱社壽國
朝洪武間謫居河間考諱晟俱以公貴贈兵部尚書
兼大理寺卿祖妣汪氏張氏俱贈夫人公以易經中
正統辛酉順天府鄉試明年第進士授吏科給事中
己巳 英廟北征公借廷臣上疏諫止不報已而師
潰土木虜遂南侵京師嚴戒命公守西城上言曰五事

曰新製令以振軍威募勇敢以備急用召勳王以通
南侵設武備以防內變養銳氣以備戰守皆見采納
虜酋也先自西山一帶進薄都城都督孫鏜禦之失
利乞領衆入城公堅持不可躬督諸軍自城上以火
鑊礮石鼓譟爲鏜聲援虜引去景泰元年命公充副
使持節冊封華陽王妃凡王府有覬遺悉却之歸陞
左給事中辛未九月 英廟還自迤北居南宮公復
上中興固本十事言皆剴切其敬天一事則當時天
象屢變請景皇帝隆孝友之實以答天心之仁愛聞
者壯之壬申陞山東右叅政總理遼東邊餉巡撫都

御史寇深奏倉官吏卒盜糧一石以上者死乃造新斛視舊加二寸付公公立碎而火之曰使彼真盜死不足卹今故爲此斛置入於死地豈情也哉遼卒至今能道其事會以憂去轉四川分巡所至問民疾苦松潘夷人作亂公偕侍郎羅綺進攻破其黑虎三捷諸寨天順丁丑英廟復辟公奉表入賀時方錄景泰間上言之人遂留公爲太僕卿遼東巡撫缺員陞公都察院左僉都御史賜勅以行守將海軍伯董典姻聯曹欽公一切裁之以正又造戰車創義倉行贖罪法設月輪簿凡百號令一新建州夷酋董山潛

結朝鮮公使土官佟成授以成筭往廉之得朝鮮授董山中樞院使制書以還公疏曰乘其未發急遣二使問之可伐其謀朝廷乃命一給事往朝鮮一錦衣譯者往建州兩酋初不肯承出制書示之咸相顧愕然入貢謝罪虜酋孛來聚衆欲入寇公自率師巡邊營于境外者凡三月得風濕之疾自此始都指揮夏霖事多不法與董相結納僉事胡鼎按其罪四十公以狀聞詔中官及錦衣郭指揮逮霖而籍之不意中途受賂乃奏虛實相半寇都御史因併劾公聽胡僉事言妄奏調南京太僕少卿刑部缺堂上官廷

臣言非公不可召陞右侍郎復以憂遷河間成化紀
元 今上皇帝即位起復公于兵部又轉左丁亥四
川貴州山都掌蠻據大壩山箐之險叛服不常陞公
尚書提督軍務與襄城伯李瑾統番漢兵討之公至
永寧自督大軍入金鵝池又分四路兵期會于大壩
將士依公方略用神銃勁弩攻賊賊不能支連破二
十餘寨獲銅鼓數十斬首五千級生擒二千餘賊復
走入深洞公命軍士以土石塞其門以兵圍之月餘
賊死洞中臭聞十餘里又陰祭九姓土僚之附于賊
者還師撲之未及一載鄧掌悉平又布置衙門邊事

以公之進兼大理州有白金綵幣龍衣之賜前此
公然。大壩凡兩月淫雨不時瘴癘荐興舊美樓作至
是公四上疏請老不允辛卯春上以雨雪不降求言
公復上言兵事可更張者五兵弊可伸理者五 詔
下所司執政者難之未幾三邊有事悉如公所料南
京缺餉替機務大臣達臣交章薦公為宜 上允所
請公至南京適禁出軒轅乃與六卿會議復上言興
利除害三十餘事多見諸行他若汰會縱橫舊蠱可
書者尚多在南京亦替已四載復疏乞休 上重違
公志賜勅還鄉有疾若去體其勿久安于家之語明

年公還休寧里第又四年謝世距其生則永樂丁酉
閏五月十六得壽六十有三葬邑東南南山之原配
林氏累封夫人子男三長即敏政成化丙戌進士及
第授翰林編修累陞左春坊諭德學行爲時所嘉次
敏德太學生次敏行邑庠生早卒女一許聘忠義衛
指揮子凌雲孫男三壘圻塏女三俱幼嗚呼公儀
觀魁偉性資剛果六籍百子無不涉獵爲詩文略不
經意而推渾可傳事親孝少時嘗力耕以養居憂廬
墓側有芝產之瑞教子弟嚴而有方待內外親族恩
義兼盡遇故人子矜恤振拔惟恐不及凡百玩物一

不以挂目爲諫官知無不言言必達大體而嫉惡尤
甚佐兩藩及法司必以敬正輔長官不隱忍坐視以
爲賢掌兩京兵政及征伐俱有成績又能任怨南京
叅贊或欲預錢穀詞訟公曰守備機務所以謹非常
若此乃有司之事也斷不可預論者以爲得體征川
貴時詔以便宜之權付公公自發兵至凱旋不爵
一人不殺一人同事者以爲言公曰刑賞人主之大
柄懼聞外事不集而假之人若幸而事集又竊弄之
豈人臣之道也論者又曰此古名臣之心名臣之言
可以爲後世法今若敏政輩進進不已能昌大其業

安知天之報公不在此耶晚號晴洲釣者有晴洲集
若干卷藏于家銘曰於惟襄毅晉臣之系宋儒之裔
豪傑其才剛大其氣於昭襄毅科第高登祿位馴致
兵刑律司留銘是寄吳哉襄毅直轍所至吾民獲利
威震蠻夷名揚當世無憂襄毅文事武備有人承繼
誕昌前烈引而弗替無憾襄毅善始令終 皇恩特
異歸于南山垂休千祀

奉政大夫戶部郎中李漢章墓誌銘

成化丁酉夏漢章請某曰走奉 命南首將以促漕
艤之未至者願先生有以教我某曰貴在隨其可

以耳漢章曰諾乃別嗚呼詎意此別永畢之別也漢
章既集公事便道省墓于家適鳳陽徐淮告災 上
命戶部臣慎叟各屬郎中之庶幹者五人往賑民饑
漢章乃得鳳陽 勅既至即日 上道凡鳳陽被災之
所靡不徧歷驗民丁數若干盡發倉廩濟之倉廩不
足又假于鄰邑之有餘者鄰邑不足又假于巨室之
有蓄者與凡一切公私責負悉與蠲除其寒無衣出
官價易布衣之官吏有毒民者自五品而下問之如
律城隍民居圯塞者命工濬葺用是民生小康地方
以寧漢章素清癯兼此憂勞遂成疾巡行至宿州麥

垂成霖雨殺之嘆曰於乎天乎何苦斯民至此極也
疾愈重時已得請許五人者返節吏部國泰戶部谷
琰兵部張謹偕漢章北至沛之沽頭聞卒于舟中方
病革時泰章問以家事不答惟曰諸公盡心所事吾
死不足惜恨不獲殫忠以報 國耳爲之棺歛如禮
閱其行囊書數卷而已卧茵下遺一詩曰強顏人世
已多年一事無成館遽捐仕路那知終粉署宦囊誰
信只青禮死生有命吾何恨俯仰無慚世謾憐寄與
故園諸子弟好將清白繼家傳蓋絕筆云計其日實
戊戌五月二十二日也子夢龍以同鄉同部主事

汝清狀徵銘閱狀漢章諱炯然別號贛菴系出隴西
之裔八世祖讓元金牌千戶徙青之蒙陰洞仙鄉遂
世爲蒙陰人曾大考諱燁元沂水縣簿大考諱昇
贈監察御史晉陝藩叅議歷官有水藤聲妣徐贈恭
人慶陽經歷選之姊漢章正統丁卯以春秋經領鄉
薦天順丁丑第進士授戶部主事于平準出納之際
公明果斷吏不敢欺時有權要家侵保定民田僉謂
非漢章不能直權要預以賂屬且以危言駭之漢章
一不以介意至則正其疆界卒歸于民又有真定奸
民詐以民田爲閑地投獻 親藩牧馬以奸利民源

訴于朝 命漢章偕御史往按之果民田乃遠奸民
于法淮安倉例有中官協理同事者徃徃被其掣肘
漢章徃監督之辨其不可者數事彼乃服焉時久雨
江南民運糧艘沓至漕兵候支運者亦集彼此留滯
漢章曰吾雖不便宜行事苟利兵民何辭罪焉即令
漕兵就于民艘完之兵民大利事竟以聞從之虜酋
亂加思蘭寇逆綏 朝廷命將出師討之侍郎陳公
俊督軍餉及運部屬才幹者四人分董陝西河南山
西三省糧餉漢章獨董山陝二省多方設法不事鞭
朴民爭先輸納侍郎總戎諸公咸稱曰能一應軍前
出納文移皆以屬漢章雖甚紛紜而泛應皆當虜既
退陳侍郎洎余都御史連章薦之陞郎中仍專督軍
榆林遠在絕塞轉運甚艱漢章相其便宜鑿山刊木
開路百餘里車行無滯公私兩便前此芻秣甚貴束
銀參錢漢章疏乞令軍民採取野芻運屯要害報下
行之省費無算會王都御史于紅鹽池搗破賊巢賊
悉北遁凱旋論功晉四品祿湖廣陝西缺叅政吏部
疏其名入俱不報嗣是 朝每大用缺人縉紳未嘗
不屬意惜其用之弗究也距其生宣德戊申七月十
又七日得年五十一配郭蕪湖縣丞榮之女先卒贈

宜人繼安新鄭知縣恒之女 封宜人子男四長即
夢龍鄉貢進士次夢麒夢麟皆邑庠生次夢熊女二
長適鄉貢進士官賢次適儒士王尚魯三子二女郭
亦惟夢熊安出孫男三女一 是歲某月某日啓郭宜
人之家合葬于富家山西麓之原惟漢章生而穎敏
八歲能屬文少長習春秋經日記千言爲文以理爲
主而詞次之居家孝敬初參議公得疾醫弗効漢章
憂形于色取所吐痰啖之焚香籲天願減已年以益
親壽既卒水漿不入口三日哀毀踰禮凡百一依家
禮而行先是母喪亦如是無育諸弟曲盡友愛
于成就小子由科第者多其門人視諸不義財輕于
鴻毛常祿之外無餘資故賓祭之須時假于人始自
淮而婦持二籠人以爲遠方奇貨發之乃當婦黃連
蓋舊疾所須藥也銘曰古人心今人身豐材偉行超
群倫休聲芳躅流三秦宜公宜卿宜秉鈞柰何五品
官四品祿了此君我銘玄宅垂千春

資政大夫致仕南京吏部尚書贈太子少保謚
莊敏崔公墓誌銘

皇明成化己亥冬十二月四日致仕南京吏部尚書
崔公卒于家疏聞 詔遣官諭祭營葬贈太子少保

謚莊敏同朝舊臣無不交相嘆惜惟某與公相知三十五年誼宜誌而銘狀謂公諱恭字克讓其先博陵人漢侍御史朝之裔朝十一世孫曰伯讓者徙柏鄉至曾祖諱至剛仕元爲鎮撫再徙順德廣宗因家焉妣某氏祖諱文秀考諱斌俱以公貴累贈南京吏部尚書祖妣張氏繼喻氏俱贈夫人公年二十七中順天府鄉試正統丙辰第進士授戶部主事即有能譽提督巡綏邊儲出納有法居無何用楊文定公薦知東萊東萊號難治公至舉行六事尤加意學校先是府庫壞泥爛過海布若干萬守庫之民苦之公命工別構三十間復䟽于朝量布及楮幣之過海者餘悉折軍士月糧不踰年用盡歸守庫之民八百餘戊辰萊大旱蝗公躬督捕發郡縣倉勸富民粟賑之又奏免膠州即墨諸處逋民糧草民賴以全活者無慮千餘昌邑童子史奇李春坐流言繫獄僉事古鏞必欲置之死地公曰童子何知力辨其枉又遣爲邑庠弟子員高密商人寓于掖縣盜竊其貨以去捕者疑其家孫消息所爲同知吳祐執孫考訊誣服公以未獲賊疑之禱于城隍祠陽令機兵于軍營搜檢陰使人于四門城樓偵之已而盜果委其貨于外偵者擒其

人來孫獲免又如辨即墨寡婦之執翁姪離縣民婦
之誣人為盜其跡尤奇已已虜酋也先率醜類犯京
師公聞之泣曰此臣子効力之秋也乃多方集民兵
若干各給器械委官統領先期勤王虜既退公卿大
臣皆以為忠六載之間威惠大行美政播在人口不
可枚舉百姓愛之如父母軍士畏之如神明萊人有
古之楊今之崔之謚蓋揚震舊為萊州刺史云景泰
士申陞湖廣右布政使初湖藩自布政以下魚菜油
燭茶果之類咸取辦于下公一切革去之苗賊侵武
岡公督饋餉訓飭民兵性勦之賊聞其來相率歸服

岳州報公安劔利沅民擅相殺害公曰為今之計惟
鎮之以靜而已願附籍者收之不願者秋成遣婦事
行上下稱便未幾調江西左布政將行悉以解舍中
器物歸之有司一毫不以自隨篋中惟大明律書數
卷衣數襲而已奸民有冒關廣濟庫官物餘五十萬
者公廉得實言于都憲韓公讞之連坐布政使失職
列郡官吏為之肅然理問所獄囚動二三百計多死
于臭腐蒸濕之氣公乃市旁地而廓其制復蘇潘人
命無筭又作量地之要法計役之輕重而為之任一
歲之勞者有九年之逸至今行之不改天順戊寅陞

都察院右副都御史巡撫蘇松等府所至進耆老俾
言其利害及所行當否人以爲得體崑山生龔某以
不賂御史毆某黜爲民訴于公公試其文喜曰科目
中人也檄復學後皆中科第得顯官無賴民王凱利
別籍王氏田廬自受爲軍清軍御史郭觀信之連坐
隱蔽者二十四人悉配蘇州衛衆訴于公公委所司
覈之事遂白竟坐凱以罪而釋其二十四人者都督
徐恭奏浚儀真漕河命公兼理其事役軍夫六萬有
奇公設法勸粟若干石給軍未久工畢尚餘二千石
發濟揚州飢民鎮江以南南河久淤塞舟行屢罹大江

風濤之險前撫巡皆未能爲又按其地形相其遠近
起夫十萬浚之經畫有道不告勞而大通焉常熟民
錢穆告其兄雖不法事或勸公宜避嫌公曰苟欲避
嫌則凡富者皆將視其死於不辜而不爲之所乎卒
以正法處之庚申陞吏部左侍郎置勸懲簿以錄天
下人材賢否賢者必言于王忠肅公用之否者必指
其實黜之時號稱得人無怨言成化己丑陞尚書殿
試充讀卷官尋轉南京南京屬官中恃才放恣交通
賄賂者多公黜其郎中方高門相等十數人士風爲
之一新南雍先歷事端必議北京紀選而還卒業其

中貧乏者病於往復率多滯滯公疏其不便南士得
 紀選於南部者寔自公始癸巳山東大饑菜之父老
 相語曰前崔公尚在我輩何至此強邪具公善政請
 于巡按御史立去思碑於楊震祠中甲午勅公參贊
 守備機務公與成國公關心見誠協力政令軍民皆
 翕然畏服城中侍以為安丙申丙抗章乞休致以公
 老成不允明年夏以不視事者三月復乞歸田詞極
 懇切上特錫璽書見榮其歸翌日昧爽劔虞北遊文
 武士歲于國門外者千人道傍觀者十里不絕嘖嘖
 共言其賢歸二年足跡不入城府靜坐一卷教子孫

讀書而已疾急謂諸子曰吾平生無益於國勿乞恩
 煩瀆竟不及家事距其生永樂己丑四月二十四日
 得壽七十有一配楊氏繼李氏亦俱贈夫人子二珂
 璿珂本從子璿生之明年公以為後蔭國子生君子
 又謂公不私其子云嗟夫公為人寬平坦易中無芥
 蒂好善惡惡出于天性遇後生必談政事剛而能斷
 然仁愛之意未嘗不行乎其間愛惜人才獎掖後進
 惟恐不及初廣宗地僻士不見全書公多出賞市書
 及五經四書時義之工者貽之後廣宗之士科不乏
 人居官四十餘年德澤在人聲譽在士夫公論以為

老成人物如公者一代豈可多得哉墓在邑東北蘇
村之原銘曰有備莊敏逢時之隆克庶克慎維平維
公發自地曹登于大府藩省旬宣邦畿巡撫帝曰汝
賢汝佐銓司輿暨太宰汝徃攸宜參贊南都古留後
任政通人和聲名益振歸乘大化士類同嗟天恩終
始存沒之華蘇村有阡龜卜其食勒德女堂過者必
式

古直先生文集卷之十五

誌銘

都察院右都御史致仕韓公墓誌銘

大明成化戊戌十月十五日致仕右都御史韓公以
疾卒于家有司以訃聞上遣官諭祭命有司營葬域
如制其家嗣太學生文以南京司寇張公狀徵銘于
玄室按狀公諱雍字永熙蘇之長洲人曾大父諱彥
傑積累深享貴富弗食大父諱舉一父諱貴俱以公
貴累贈都察院右都御史祖妣陳妣趙俱贈夫人貴
初以閭右起實北京宛平縣故公之發身乃順天府

庠弟子員正統辛酉中京闈鄉試明年第進士拜湖
廣道監察御史時碭山縣李教諭丘純答膳夫竹磨
兒其父令其遠遁而以死誣告純他御史勘伏純坐
償獄未決家人累奏寃都察院檄公覆勘公四散遣
人蹤跡之得磨兒於河南純得釋且復其官其聲遂
大振時三法司刑獄并劾奏章疏咸經公手未幾巡
按江西辨寃獄黜奸貪所至均望風解綬廬陵泰和等
縣大寇卒至乘時劫掠鄉村居民苦之有司不能制
公與巡撫侍郎揚公寧設法捕之得其首惡并餘黨
悉置重典地遂寧代回陞廣東按察副使邇二親就

保陳公循疏公廉能幹濟才堪大任陞都察院
右僉都御史巡撫江西公至則首推行均徭法次行
歲辦法其法規畫周密切中時弊民甚稱便值歲飢
大發倉廩賑之兼減價糶賣人得足食天順改元
英廟復辟改山西按察司副使尋陞大理寺少卿仍
復僉都御史與左都御史寇公深同理臺事嘗有強
盜十八人當斬內二人訴爲同起盜狹讎誣指寇公
曰會問已明何讎之有公曰人命至重宜暫留寇不
允固諍乃并指者留之後四人皆得白翰林院學士
倪謙主考鄉試得罪于當路緝事校尉發其結交處

府儀賓事下獄坐重典公復力諍得成宣府錦衣指
揮劉敬以石亨連坐下獄寇欲坐朋黨籍其家公曰
東漢時朋黨二字盡賢人君子公宜審之寇悟改擬
敬得千戶調山東某衛時大同守臣奏巡撫乏人上
即以命公至則刻總兵叅將貪財弛備皆逮于法修
飭界牆搜括隱占軍士設法耕墾收米易銀是以邊
備之用有餘而無私歛之擾朶頰三衛夷人因虜酋
孛來誘犯獨石公令軍出其不意擊之賊驚遁七年
議政至京陞兵部右侍郎有權貴者素啣之陷以罪
謫折江布政司叅政成化改元兩廣蠻寇猖獗累征

不利上命都督趙輔為征夷將軍和寧為遊擊將

軍惟總督軍務者難其人僉曰非韓某不可復改左

僉都御史以行時言者謂賊在廣東宜逐之在廣西

宜因之衆議紛紛不定公大言曰大藤峽賊巢也舍

此而不圖吾未見其能濟遂肅師而行抵廣西界議

遣都指揮趙倫都指揮鄒宏副總兵范信叅將孫振

各授以方略仍檄湖廣總兵李震預備公乃連營以

進至金州謀報賊在湯洞公互發偏師連戰皆捷生

擒渠魁數人皆磔剔以示軍威大振又以脩仁荔浦

皆峽賊羽翼乃分兵將為二十五哨公與總兵官領

中堅進攻彌月峽賊遂平路無阻絕捷聞 賜勅獎
勵陞公弟睦為錦衣百戶復移師潯州益增器械備
餼糧令五哨由峽後進公督八哨從峽南進復令二
哨援於後別遣將士斷諸山口賊聞乃掣妻孥輜重
于橫崔等厓極險處預於山南立排柵滾木礮石標
鎗毒矢如雨而下公覘其將怠遂奮甲先登士魚貫
而進聲震天地縱火烈焚日色晝暝賊不能支乃遁
去公益進衆云險不可進公曰破竹之勢不可少緩
督進益急直抵橫崔等厓又進至九層樓等山壁立
萬仞勢控霄漢公復計遣將士於賊所不備處攀緣
至絕頂舉砲為應衆復環攻數十合峽遂破前後得
大小寨峒九百餘處改大藤峽為斷藤刻石山頂以
紀厥功初公令士卒得一山一寨即堅守之故賊無
可反之計許生獲被虜男女以准其功故士無妄殺
之慘又謂峽內餘孽尚存終必為患宜設七官編管
仍徙周冲靖寧二巡司于峽之上下增土人為副巡
檢復置千戶所以鎮藤縣五屯種人凡可以固峽之
策無不行之先是公命將與廣東守將共勦廉雷等
處流賊猶未成績至是又分遣官軍往助旬月間生
擒斬首及奪回俘獲共四萬一千七十有奇凱旋至

廣東捷聞陞左副都御史提督兩廣軍務公奏兩廣
地方相去五千餘里臣一身不克周悉宜用都御史
二員巡撫從之會以父喪守制還吳既而六部各衙
門大臣言梧州宜設總府總督等官居中調度殺賊
良便從之即其家陞公右都御史總督兼巡撫重書
聽便宜行事公至築城屯軍以鎮禦地方鑄鐵索柱
繫浮橋而絕賊船置木牌以覺察奸細出官柩以瘞
亡卒培松楸以葺先賢之祠皆大服人心九年少監
黃沁以公務與公不叶訐奏數事公不與較即具疏
乞休致家居又六七年以山水為樂君子曰明哲保

身公其有之耶其生則永樂壬寅十一月九日春秋
五十又七娶王贈夫人繼金封夫人子男三長即文
王出次敷金出次敞側室王出女一適蘇州衛指揮
使王英孫男二女二葬某山之原於予公之為人爽
邁洞達才識高遠居家孝友與人交有信義下筆為
詩文思如湧泉無少凝滯居官處事動以古之豪傑
自居每一出師必以曹彬不妄殺為法以曹翰妄殺
為戒故所至全活甚重累謫累起未嘗一放戚於其
間天下士大夫無不識咸仰其名云銘曰有備
其人其有碩其才發身賢科肅政蘭臺為節初終執法

或貳兵曹或貳廷尉載微而起督師導江巨寇
以平吾民用康天書斯頌揚休播美穹秩是登儒紳
罕比令聞彌著成績孔昭不進之求惟退之高哉我
吳山悠悠心玄室勒石是銘千載無斁

資德大夫正治上卿太子少保戶部尚書贈少
保益恭襄馬公墓誌銘

公諱昂字景高姓馬氏其先河南祥符人後移籍河
間之滄州大父諱才與考諱欽俱以公貴累贈貞善
大夫都察院左都御史祖妣楊氏累贈夫人妣秦氏
封太淑人贈夫人公初為郡庠弟子員永樂癸卯鄉

試中式明年會試下第入國子監宣德丙午以

俊偉聲音宏亮授行在鴻臚寺序班正統丁巳用

臣薦陞監察御史奉命整飭宣府大同偏頭關兵備

及巡按陝西淮陽徽州等處所至有聲癸亥行在刑

部獄禁失嚴囚因劫獄逃竄尚書以下咸禁錮跡捕

乃陞公右侍郎未幾改右副都御史叅贊甘肅軍務

時叅贊都督王喜玩寇失機公至劾其罪請成遼東

官軍畏服先是赤斤蒙古罕東等衛番族恣肆鈔掠

至強劫總兵進貢馬駝公受命帥將士討之盡得主

名梟示及擒其偽初王鎖南奔拜妻子械送京師自

是番人不敢近邊已巳北虜寇甘州公令人畜悉入
城堡簡精銳選騎射躬探甲冑出屯山隘以伺窺聞
適去西邊方倚公而以乞疾忤旨乃命致仕景泰庚
午也甲戌兩廣夷寇擾攘 朝廷召王忠肅公還為
吏部尚書起公代忠肅總督兩廣軍務兼巡撫便益
行事公乃大布 朝廷威德帥總兵方岳并土官兵
民勦其為暴害者生致其偽將軍周鐵盛盤馬蹄等
獻闕下上遣行人勞以緜幣寶鈔陞右都御史丙子
征斗峒賊平轉左都御史天順丁丑有不足公者造
謗上命致仕及入見復留命之山西巡察邊境比還

遂理院事戊寅陞兵部尚書辛巳虜寇陝西勢甚急
命懷寧伯孫鏗為總兵公仍總督刻日出師是夕曹
欽反公與鏗討之欽伏誅進太子少保仍掌兵部事
自是上寵待特厚嘗乘輿以金玉束帶繡金履賜其
銀幣玩器書畫禽鳥時鮮之賜歲無虛日衣有虎獸
哈喇者雖勲戚有不可得者公與賜焉屢召遊西苑
南宮及扈從較獵南海子一時進退廷臣亦必召公
咨訪甲申今上嗣位信任益篤調戶部尚書尋奉勅
同右都御史林聰給事中潘禮陳越按籍點軍士既
畢乃分精銳者為十二營以備調用又籍軍帥之賢

否而黜陟之慮後事之遠變而禁約之實出公之議
云戊子公年七十時有災異謫見力求退避從之且
賜勅以榮之陞辭復賜譙錢并寶劍若干既歸八年
精力猶健暇則教子讀書或跨馬詣村莊課僮僕耕
種者德晚福士林忻羨偶微恙後三日而逝實丙申
五月五日也距其生洪武己卯三月二十五日享年
七十有八訃聞上嗟悼贈少保謚恭襄遣官諭祭營
葬事配趙氏累贈夫人繼王氏累封夫人側室蔡氏
趙氏奉氏子男三長忠以蔭補國子生次恕錦衣百
戶次惠忠趙出恕惠泰出也公生而岐嶷成重天性

孝友事母極孝敬有十六憂形於色視諸猶子愛之愈
已出祖產悉推讓與之其在官時部屬持堂稿咨稟
公略竄數語而事理明允雖積思者不能過也以其
年某月葬其山之原銘曰醫宗恭襄公事我 宣皇出
參戎務用靖邊疆北虜南蠻咸知名姓爰抗爰禦出
奇制勝惟公重望正位兵曹秩登保傅龍文載褒四
方告饑疇思國計 天子曰嘻公其可恃腰玉衣紫
垂五十年殊錫異賜今尚在焉公鑒前哲即知止足
乞歸來兮耆德晚福家居既久溢然上征卹典之厚
生死之榮馬鬣有封玄堂有石勒德振華昭示無極

贈衍聖公孔公夫人王氏合葬墓誌銘

太史公記魯哀公十四年四月孔子卒葬魯城北泗
上至六十代孫承慶暨配王氏卒祔葬于側子弘泰
馳書京師問銘于大學士劉某曰古者列國諸侯大
夫有德善功烈子孫必為器以銘禮也禮國人為之
茲魯無君子乎而千里外而問銘焉無非所以欲彰
其親之善慎之至也豈敢悞不腆之文乎爰誌曰公
字承祚曾祖訥祖公鑑父彥縉皆衍聖公曾祖妣祖
妣妣皆夫人夫人姓王氏父賢致仕順天府尹妣某
氏封淑人公生於永樂庚子三月七日夫人生於永

樂己亥二月二十二日公出於大聖人之後長於大
聖人之里耳之所聞者聖訓目之所親者聖善十一
歲遭母喪自知秉禮旦夕哭泣本族人尊卑無慮數
百皆曰此兒遠大器也稍長奉諸母諸弟行皆得其
歡心其於六經百史涉獵殆盡尤嗜詩有禮庭吟稿
若干卷藏于家視世之富貴侈靡若將浼已鄉族有
衣食不足婚喪不舉者周之為常故賢譽駸駸孔宗
之右公之實如此夫人少讀文教諸書善於禮且性
孝慈女工家務如素習然井井有法孔王二家相去
三舍許同契有素一言而姻締矣既歸以事京兆之

孝事舅姑以治父母之家治天家事夫以禮儼乎大
賓也訓子以嚴儼乎師也夫喪舅喪一遵家禮守節
三十年不御膏沐魯之女婦前乎夫人者日數不及
後乎夫人者咸取以為法夫人之實如此公以景泰
庚午十一月二十六日卒春秋三十一 朝廷遣禮
部主事周騏諭祭工部員外郎某治葬夫人以成化
辛丑正月七日卒春秋六十有三葬於是歲十二月
二日合焉前云祔葬于側是也子二長弘緒天資秀
共聰明倍常於凡書典過目成誦所作詩文清新可
觀字畫端楷彥縉卒未幾 召至京命襲衍聖公

即賜誥贈公如例妻封夫人次弘泰亦襲封焉而作
字作詩不下于兄處已待人中乎矩度二子者其皆
及識見稱其孔聖家兒也銘曰尼父傳來六十世孫
子振振引無替禮庭頭角逸凡庸有淑者媛其伉儷
家藏詩句鬼神驚人說才華瑚璉器本家族屬因禮
周近魯貧窮同一視彰彰聲譽四方聞座右奄看鵬
鳥至夫人傷盡未亡身三十餘年堅節義懿規真是
女中師二郎並作雲閣瑞高堂盛福老逾安泉下卿
鄉成父逢清朝卹典已均覃幽顯哀榮良有自聖澤
綿延天地長萬古虹光照清泗

贈太子少保謚莊懿南京刑部尚書致仕周公
墓誌銘

大明成化二十年甲辰五月六日南京刑部尚書致
仕周公卒于正寢春秋七十有八訃聞上遣官諭祭
命工部營葬域贈太子少保謚莊懿恩至渥也子經
將奔歸卜以某年某月某日葬某山之原以其舊知
徵銘于墓乃誌曰公諱瑄字廷玉別號葵軒世為山
西陽曲人祖考諱溫甫考諱傑皆以公貴贈資政大
夫都察院右都御史祖妣任氏妣張氏贈夫人公幼
異凡兒考資政公甚鍾愛之時有譚曾二先生者皆

初名賢亟遣從學洪熙乙巳選入郡庠為生員宣
德乙卯登鄉試會試中乙榜不就東書入太學以
天下士學益進正統甲子用吏部銓授刑部江西司
主事精究法意讞獄明審尚書金公於群屬中獨愛
重公凡大獄必以委之有死罪囚累訴其枉公乃微
服訪之累月一日至城南閭村姥言其事果實因得
釋給事中程讓御史劉訓給燕山左衛鈔証官盜取
下法司公辨其誣由是賢聲大著丁卯奉命督南北
畿重囚所至多平反者已巳北征部屬當扈從者率
多託疾公毅然請行被違劄而還賢初階署河南

司郎中事有被尉受贓縱真盜而以宿讎寘其間欲陷之死公力辨之被尉反坐公視獄有囚八百人時天暑懼有病死者三日盡發遣之衆以為有片言折獄之才庚午賜勅封贈考如其官母妻皆安人時刑部闕右侍郎吏部推公代之公益盡心以洗冤澤物為已任辛未詔辛太學有緣幣之奏甲戌賜誥封贈祖考考如其官祖妣妣妻皆淑人應天河間二府民饑勅公往賑之二府言無畜積又遭遭大水公條奏八事一裁省各處冗官二停徵當歲糧草三添減軍士糧草如舊四免追久負馬羸牛羊五暫罷供應柴炭夫役六皇莊湖泊之利恣民采取七招商中納鹽糧損其斗數八借水次官倉之粟濟民事下戶部不能皆從而招商借粟之說尤以為難上聞詔特從公議公又為之具耕牛種子以便于民時亢旱苗稿公行部至武清懇告于上下神祇是夕大雨明日至滄州致仕尚書馬公家居謂公曰昔有御史兩今為侍郎兩矣秋大熟戊寅陞左侍郎有二品襲衣之賜癸未命掌工部事又命掌都察院事成化乙丑今上改元命公祭告中鎮霍山及晉代潘三府先生因得過家省墓會族鄉人以為榮未還陞右都御史總督

南京糧儲至則嚴告戒祛宿弊有侵盜爲奸數輩悉懲以法謫戍遠邊倉場爲之肅然南京守備大臣輒欲校斛以侵公公上疏劾其非六科十三道復交章論之由是守備者被切責乃己未幾上南京城守事宜八條又每歲朝京多所建明戊戌南畿糴貴詔公發京庾之粟賤鬻之以平其價民食不艱畿輔乃安又得二品誥封贈祖考考如其官祖妣妣妻皆夫人是歲陞南京刑部尚書公告戒諸司事非會勘者不得出五日以是無冤滯之囚嘗值獄瘟輕罪悉縱遣之曰有事則召對歡聲載道南部起自洪武間至

是傾圮公得請重脩而益以私享之載輪奐一新甲午以考滿乞休致上免留不允繼又上章皆不允至冬復以三載滿入見始得遂所欲焉公先世業鑿無田產迨公益畢力于公家不及私且久住金陵樂其風土遂仍歸江南寄籍江寧蓋公之婦也日與故人親戚飲燕登眺甚樂久之失明經聞之急請歸省見公飲食談論如舊意其福壽方殷未艾也經還朝後三年而公不可作矣實甲辰五月六日享年七十六公元配喻氏鎮撫某之女贈夫人繼顧氏封夫人男八人長即經天順庚辰進士歷翰林檢討累陞左春

坊左中允次綸太學生先卒次紘成化戊戌進士南
京吏科給事中次統次縉次紳次縉早卒次維女一
人適馬尚書子太學生其孫男十二人孫女九人惟
公德性寬宏氣度詳雅脩髯長身議論英發平生所
歷官皆循序而得不枉道以干人在國子特同堂生
居相鄰喪妻無所得樁公因家人送貲爲至傾囊與
之爲主事時有罪人貧不能輸官紙將衛幼子訣別
不忍聞公以折糧絹償其直還其子事親最孝遇時
節老年猶悲泣出入兩京法司幾四十年無毫髮傷
大害物之舉至于領賑貸督京庾活民利國之功尤
多故位登八座壽幾八袞子孫二十餘人策名甲科
聯官清要以並承于公後則公之榮名始終慶澤宏
遠求一時豈多見哉乃銘曰鳴玉天朝緋體犀腰入
者或驕日暮三尺獄罔寬抑入者或失出濟兩坊子
惠黔黎入者或遺矧操素行平和莊重入者或病雍
雍周公四美在躬四失無蹤踰七望八重頽鶴髮奄
違貴閥踈戚嗟傷血卹典汪洋生死異常尚德桂子可
敬可喜孰與倫比埋玉金陵勒石銘銘壽千萬齡
大明奉政大夫戶部郎中馬公墓誌銘
於戲君自今歲春夏以來無日不欲見某或迫于政

弗往則命僕逆諸途必面見斯已見則絕口不談聲
利仕進援閱古今方劑期以療疾至秋八月間見某
嘆曰吾祖宗積德百餘年發于予不能昌大前烈可
愧也諸子幼無知敢託又曰予疾必不治玄堂之銘
子其無辭某曰止毋規規常此將有瘳二十有七日
晨起衣冠策馬詣部中別諸寮友繼抵某家既出及
中門復回揖某妻曰永訣矣端坐正寢時至亥而終
於戲不知言之指人則何若也君諱孝祖字德源生
於陝西隆德縣長端昌平入學爲增廣生員通書易
二經正統己巳虜寇京師君怒髮上指伏闕上十三

事內養聖心禮大臣抑遊食整道巡備恤故舊革貪弊
旌節義士事行焉大有裨益喜嗚呼劉黃策捐貲構劉
黃祠過狄梁公廟見門額壞卽爲整之扁金大字揭
其上曰彼劉梁吾徒人也可不敬禮景泰丙子科中
鄉試天順庚辰第進士授江西司主事凡事來惟以
忠厚爲主三四載督納江西北直隸各府若糧稅錢
帛各二百餘萬升尺不爽他司難決者大司徒命質
于君君據法處理必公必當衆服之曰能武清民地
二千餘畝爲豪右侵據上命君往勘君至率有司設
法丈量疆界以清率歸于民豪右雖然以君公正無

如之何成化乙未陞郎中奉勅總理宣府糧儲時萬
億等庫場軍斗韓榮等百餘人被誣發役窮邊君上
疏爲直其冤榮等得回至今各家圖君之像祀焉其
他收放以時措置得宜兵士感戴比受代計羨餘糧
七十萬草九千萬銀二千兩布花六千疋斤謂某曰
勢要投書者至四百紙皆欲規利吾收之不行君視
之啓篋果然大司徒年公馬公楊公撫掌曰馬郎中
好官好官已亥歲方寇大同及榆林諸執事以糧運艱
難爲憂上仍命君往陛辭有寶鈔之錫後往遼東亦
然京堂及外藩員缺縉紳皆曰必馬公可吏部兩

君名卒未及用君生於宣德丙午四月十七日卒于
成化辛丑春秋五十六葬城西積粟山之原從先
兆也高祖諱進元隆顯衛千戶妣邢氏曾祖諱得興
元提領妣王氏祖諱從善讀書不仕妣李氏父諱王
國朝隆德尹賦性仁慈蒞政循良祈雨即雨蝗災則
禱之蝗悉飛入黃河又有神異之感以君貴誥贈如
其官妣張氏繼張氏俱贈宜人配郝氏先卒繼賀氏
贈宜人陳氏封宜人子男六長欽冠帶合人次鑑承
差次孫次錡次銳次鏊於戲君於天文地理醫卜咸
竅妙輿所著有渾天周髀雷電先後日出入及午遠

近大小等論君於持身行己居官臨政成欲追配古
人所著有自家錄言行感德錄讀大學錄管平一覽
諸書有足徵者君平素嚴奉就是以官止於斯夫某
之妻君之妹也可辭為銘曰維人平上維心休休宜
巨施而弗獲巨宜修齡而弗甚修豈已然者之預定
抑未然者之可尤已矣乎君其安于斯丘

古直先生文集卷之十六

行狀

先妣行實

嗚呼天乎某今日乃哭吾母天胡降割于我家邪昔
某年十三時吾母即割愛遣游鄰邑學越二載歸復
遣游本邑學暨忝竊科名官翰林者二十有七年中
雖兩告覲省然皆未足以殫人子之心今年春正月
訃音偶至某聞而昏仆于地經宿方悟號天叩地無
以自容亟奔歸大事既襄切念吾母生也某不克一
日養歿也不獲一言永訣天地之間罪大惡極莫某

爲甚矧蒙勅勅厝一墳爰慮吾母恐懼結數緣于墓
左夜棲于中庶幾魂夢下接吾母之靈以相娛樂既
而內外族屬迺邇來慰因談吾母之德善無不舉手
加額曰非可以言也吾母生平質實無偽未嘗出一
誑人語廩粟出入斗稱不知計較或有故遣婦稱量
婦有因私與者心雖知之亦置之不問曰彼各親其
親也吾家視此爲常事待所養雖嚴撫育之仁未嘗
不寓義女之子名敦兒五歲而孤嘗患脾積歲餘顏
色枯槁氣息奄奄人不可近吾母親爲易幣供飲食
延醫調治不憚勞苦半年病愈君子曰仁母也敦兒

今已強壯永樂中先伯父宦游南京伯母楊氏遠行
穿著不足吾母時亦不自給乃脫金荔枝首飾易疋
絹潛置伯母行裝內無復知者伯母沒齒不言吾母
亦不與人言惟家君知之東鄰媪趙氏家甚貧或乞
粟帛若布或乞線絲箕帚小器等吾母隨乞即與之
如此者十餘年君子曰好施予者固有之至於久而
頻數不厭者惟劉賢母然媪將殂吾母知其無襲衣
急取細布二疋遺之復持瓜果藥物往視媪頓首曰
不能報恩皇天有知願延母千歲壽且使子孫常顯
宦言既而殂正統辛酉大水洋河堤決時鄰叔居叔

先穴房後垣水遂浸吾家垣悉圯男女行水中至沉
寗沒牀舉家尤之抵晚吾母即土牀造餅謂子珽曰
吾見汝叔未飯可召與而父共叔來歡然若不知者
識者曰於此可以觀賢母睦族之仁三沐 恩封處
貴富不驕不吝年踰古稀猶朝夕自理庖廚不怠壺
範內則母儀婦道沒後愈彰徹大行今內閣大學士
彭先生雖曾表于墓於吾母德善有未盡者某茲廬
守墓下又得族屬傳此數事特勒之碑陰嗚呼吾母
不可得而見矣天地山川有時而盡某之恨蓋無時
而盡痛苦之際言不敢文亦不敢一字妄也

祭文

祭彭文憲公文

曰於虜天何降割于斯文邪先生其永畢于茲邪吾
君將誰爲共啓沃邪吾民將誰爲共康濟邪吾道將
誰爲共輔翼邪此予輩於先生之亡大慟而不覺其
失聲也於虜恬淡寡欲表裏一敬不力而勇似柔而
勁居則於物靡不含容遇所不可則如砥柱之有定
聆其笑言而不苟舉其平生而無競此先生之爲人
有足重者校讎群經探討百子益我身心曰惟性理
窮朝竟夕擷芳茹美闡程之戶得朱之髓奮其雄詞

浩乎無涯理趣極其縝密機杼自成一家是以二十
年來司帝之制高文大冊播諸邇遐此先生之文學
有足嘉者乃若出仕而廷魁俊彥遷秩而黃鵬傳經
東觀東朝清卿亞卿大家宰兼大學士保儲副復保
聖躬緋袍玉帶茂實芳名主典文衡時稱精鑒總裁
史館不昭管彤入告于內則嘉謨嘉猷宣政于外則
爲軍爲氓夫所謂人之著龜邦之典刑此先生之歷
官行事有足徵者 當宁與嗟儒紳於邑有贈有謚
有葬有祭通都大邑之匪姻匪戚亦皆心痛而首疾先
生之亡百年一日公論如前俯仰無慙得今人所未
得全古人所未全先生之存一日百年於學在耳目之
言在目之儀一覆手間魂其何之此予輩之慟直以
爲天下而不以私九泉之靈有知無知生死之訣盡
此一卮尚享

祭程母太夫人文

於乎女中之宗壺內之則徽譽於昭斯夫人之德作
配君子維室之華外雍內穆斯夫人之家直節正言
風動遐邇國之巨公斯夫人之子幼名神童長爲國
珍能詩能文斯夫人之孫自天錫誥貴于華屋霞帔
珠冠斯夫人之福鶴髮日新朱顏如舊歲迫期願斯

夫人之壽夫何天不延夫人以範世而遽於此乎永
畢此所以京師名門大族爲之悲慟而區區內交於
令子者爲之傷盡我心惟誠我酒惟馨跽奠棺前以
達于冥冥

祭封翰林檢討邢先生文

先生環偉之資介特之操肆力群書兼通小道其視
義若泰山之高其視財輕一羽之杪其邇貧也傾素
衷而未足其拯難也原天性之攸好奉先睦族却金
止盜化鄉人而匪麗于罰瘞遺骨而奚責其報當代
史臣咸擬其有古儒者之高風顧予小子亦云醇乎

其非矯嗚呼善非不集也惠非不施也譽非不彰也
允宜百千萬歲而柰何乎天者尚吝其期耄而不以
昇斯老耆者其有在於仲子以食其效邪前此五年
親覲語笑訃音倏來西瞻悄悄望數千里之遠來得
躬一觴之祭告使予含長慟之淚緘此辭以寄夫香
香尚享

馬德源祭文

曰嗟嗟德源而遽死邪何幽燕正氣而遽止此邪窮
理之妙立言之固今世之士後誰知邪心厚而仁才
敏而通方期以拯濟斯民顧乃回翔于地曹郎邪嗟

五
五
左德源某有以知其所存矣嘗爲某言時之大官亦
必得之吾安能仁仁伏首于人門邪彼執柄者顧忘
不暇豈解公于用賢邪是以德源卒老于下位雖死
而不憾也半載之前預知其死日速某過話其所以
我家惟難我兒咸幼我茲已矣君其是佑我負我祖
我名弗彰佳城之厝君其是襄方死之旦謁某永訣
懷抱未悉而命已竭惟其甚愚肯孤所託異時泉臺
相見無怍臨棺一奠雙淚長流嗟嗟德源一別千秋
尚享

掌教先祭文

於戲頻年以來教音數數欲一聚首而今竟不獲邪
痛哉曩弟提孩與兄同受學于吾父膝下暨將弱冠
又同肄業于儒庠後弟叨官內苑兄亦振鐸古饒歷
履三任不願顯秩當道者或欲薦爲御史兄則固辭
或欲薦升冑監兄不之諾恬退之志清白之心介特
之操斯世之士幾人能同邪分外之事毫釐不干非
義之財視如塵土口不言人之是非於中自有定
見斯世之士幾人能知邪惓切之念手足之恩或弟
有過則蹙然以悲或弟改過則躍然以喜本宗之人
幾人如是邪於戲豈意一朝遽成千古既爲位以泄

哀復緘詞而致奠話言有盡淚灑無窮尚享

古直先生文集附錄

祭文

誌表

祭文

維弘治三年歲次庚戌某月某日禮部尚書兼文淵閣大學士徐溥等謹以香楮之儀寄奠于

太保古直先生劉公之靈曰維嶽降神生甫及申昔聞其語今見其人青齊爲邦去嶽甚邇乃篤生公起于鄉里高登科甲早入翰林聲望炳然有美南金工于編摩存乎國史唐之吳兢直與之似長于勸講父在經筵宋之祖禹美莫能專受知先朝眷遇

殊渥暫試吏曹竟居綸閣讜言正論多所建明上裨
聖主下福蒼生豪邁之資剛直之氣自信不疑寧取
顛躓雖解機務如公論何爲公身計所得則多朝野
顯顯望公終起曷不少延而止于是公雖云沒恩
與不衰究公終始何失何虧維公平生篤于行孝侍
養既終沒也含笑交游之際道義是敦溥等從公情
重斯文別公數年無復相見馳此薄誠有淚如霰尚
享

維弘治三年歲次庚戌某月某日吏部尚書年生王
恕謹以香楮之儀寄奠于

大保古直先生劉公之靈曰惟公粵自妙齡已負豪
邁之氣聰明絕人二十餘而登科第入翰苑與諸名
公游不逾月而上下交譽文章高古有韓柳之家風
書法道勁得義獻之筆意器量洪深而有容接物以
誠不以僞言不藏機心地平易 經筵進講句讀分
明而義理昭著 聖心悅懌而 聖德爲之日新不
替進與樞機大展經濟臨大事決大疑亦惟主乎仁
義羽翼 嗣皇有死無二直道不容於時功成翻然
而退所謂可以託六尺之孤可以寄百里之命臨大
節而不可奪者惟公於斯爲無愧予與公相交四十

餘年中間契闊之時多會晤之時少不意予赴召
於公既歸之後不得與公一會欲俟退休相期於衛
河之濱以話疇昔今公已矣竟莫能遂聞訃悲傷涕
澌如澍千里緘辭聊陳薄祭魂其來歆莫我見棄尚
享

維弘治三年歲次庚戌某月某日六部都察院通政
司大理寺等衙門尚書耿裕等謹以香楮之儀寄奠
于

太保古直先生劉公之靈曰惟靈青春黃甲沛然懸
河之才金馬玉堂燁然華國之器其得君而專政也

鳳閣鸞臺慨然行道濟時之心其急流而勇退也

杖芒鞋超然箕山頴水之志故其入相也 朝廷爲

之清明士林爲之增氣黎庶以之康寧四夷於是仰

治其罷相也 朝廷如失股肱士林如失左契善柔

不得安生強梁不知所畏及其不幸而薨也當宁爲

之震悼士林爲之憔悴彼善柔不勝其驚惶雖強梁

亦各爲之辛鼻是則公之一出一處治否所繫一始

一終俯仰無愧一生一死哀榮兼備可謂道不負

明時而德稱其高位者矣裕等夙瞻風采每聆高議

骨肉情懷金蘭氣味方仰威鳳之來儀遽聞凶訃之

遠至嘆執紼之無由徒臨風而隕涕夫豈但斯文凋
喪之傷抑深為國失老成之喟嗚呼哀哉伏惟尚
享

維弘治三年歲次庚戌門生都察院右僉都御史李
介詹事府少詹事費閻右春坊右庶子董越等謹具
香帛東向再拜昭告于

尊師古直先生劉公之靈曰嗚呼先生生于世可謂
奇偉不常者矣始以妙齡高舉於鄉其駸駸遠大已
如瓠之建水頽之脫囊繼以見屈禮闈卒業上庠雖
曰鷗鷖偶折翼於霄漢驩縮暫蹶足於康莊然嘗如探

必期闕仁義之奧博取至直涉道德之洋遂使時稱
老師如李古廉者亦曰吾當進之忘年之列安敢實
之諸生之行賜第甲科年纔弱冠途膺妙選登進玉
堂遭際既多於一時而才譽尤擅乎三長再選學士
蔚乎人望其輔導東宮也翼翼小心敬恭不忘朝
夕啓沃曰周以詳迨乎進講經筵也所陳周孔所
期虞唐論及肯綮直言以匡雖一二之素仇亦首俯
而心降主考春闈藻鑑既允賴乎衡鑑遷官少宰人
物又曷逃乎否藏清風黃閣在帝之傍忠鯁直諫
日唯贊襄其功業之上在社稷下在生民者較古

名相又執軒輊而低昂亢極思退髮猶未霜一旬之內乃厯數章 皇上特俞其請錫賚浩乎其莫量尚有優命有司肅將制金可散於太傅之疏祿不絕於少尹之楊雖一飯不忘乎思報於君恩而三公豈博乎養志於高堂放懷物外陶情醉鄉何善人之弗壽竟一疾而云亡上始聞訃盡然悼傷卹典駢蕃玉音輝煌夫既極於始終之哀榮復何憾於委順而徜徉嗚呼先生明白洞達毅直剛方一言之出洞見肝腸事苟關於利害雖寵昵嬖孽而視之若毫芒以死也直于士夫夫然騰說啓謗豈但止一臧倉先生

於自信節愈堅而名愈彰如先生者其幾希矣豈阿私所好而過揚哉某等昔執事於門下蒙不棄乎謬荒追感恩義天服心喪緘詞薄奠聊此一觴謹東向而再拜淚注下而淋浪尚享

維弘治五年歲次壬子某月某日門生程敏政謹具香帛緘詞東向再拜昭告于

尊師古直先生劉公之靈曰惟公鍾海岳之英抱經濟之學才氣振千古之豪文章擅一代之宗輔

聖德于青宮贊廟謨于黃閣有力扶正論之節莫久于釣篋有陰翊宗社之功卒困于柄鑿六旬初屈

即返立國百年爲期逝翔家廓何君子企公之深而
造物者遇公之薄也惟先君號金石之交故賤子有
門牆之託雖學倦而行迂兼志強而才弱寧以道爲
屈伸敢因時而前却嘆我生之不辰而教言之如昨
也訃音歆聞驚涕雨落日月推遷林野蕭索謝傳不
起于東山司馬竟終于西洛此心皦日亦何損于衆
咻世能浮雲會直公之一噓顧生何知負恩懷怵身
幸免于竄投病未離于砭藥遙瞻几筵一酌清酌公
神如生鑿此哀恪嗚呼哀哉尚享

維弘治五年歲次壬子某月某日門生左春坊左諭
德張昇謹具香帛東向再拜昭告于

尊師古直先生劉公之靈曰惟公挺生東海之瀟湘
際文明之世鍾淑氣而英豪積正學而淵遠早奮
賢之利荐歷清華之地滄溟培其大風盤根別其
器筆掃千軍之雄詞偕二峽之勢導青宮而啓
勤入黃閣而論思契豎九秋之鶴立隱群邪之狐媚
彼皆險巖我獨易易彼皆詭隨我獨毅毅我亦何心
彼乃謔忘勇賦歸去之詞何泰始終之義侍器
高年合天倫於鱗萃觀公之氣象也如今古之剛如
之粹計公之壽考也宜山之高宜川之至未
何復嘗

遽奪國瑞嗟哲人之三矣嗚呼士林之感喟某濫守門
下禮義沾漬二十餘年如一日視其柩數竒焉虛名
累觸奸網之機寡包荒之智跼伏江湖五稔又四限
南北之殊途無門牆之可伺膏肓之疾誰砥茅塞之
心誰治萬里神交空勞夢寤憶蓋棺之日阻執紼之
使遠負恩私祇增深愧嗇歎何存泉臺永閔瞻東國
而哀號倚西風而灑淚式介便鴻緘詞以寄惟其墜
之尊醪遙致尚享

維弘治二年歲次庚戌某月某日山東巡撫都御史
王霽謹具牲醴之儀致祭于

柱國太保劉古直老先生之靈曰惟靈乃負梁棟之奇
材稟剛大之正氣早飛騰於甲科已簡閱於先帝
遂登庸於黃閣履慶風雲之遭際運經綸於一心實政
本之攸繫致聖君於先定溥聲教於斯世兒童童識
其姓名朝野稱其謹議况發越於文章擅一代之任
製肆國史之謹嚴賴三長之修記顧寵任之方殷俄
失理於榮衛遽上章而乞歸拜金門而謝事結綬野
之高堂樂林泉之清致咸願公之後相胡一疾而云
逝予來撫於茲邇每傷悼之無替聊陳辭以侑觴庶
微敬於斯祭尚享

維弘治三年歲次庚戌某月某日都布按三司布政
吳珙等謹具牲醴之儀致祭于

柱國太保劉古直先生之靈曰惟靈英傑之才經濟
之學早歲瀛洲遂登黃閣累朝內相致君澤民坐令
六合固於同春冠世文章班馬並報出納絲綸作
帝喉舌調和玉燭泰階以平兒童走卒咸謚公名大
義孤忠始終一節正言謹論灑示不可奪封章屢上謝
政東歸民懷柱石士矢箴規中外傾心期公垂用奈
何一疾摧此矣棟某等同官藩司景仰公德倏聞凶
訃痛傷不自教奠醴醢載具頻禱系神其不昧鑒此侑

言尚享

維弘治三年歲次庚戌某月某日青州府知府張本
等謹具牲醴之儀致祭于

柱國太保劉古直老先生之靈曰惟靈通敏之資剛
方之氣蔚然經濟之文允矣廟堂之器一誠而感
君心片言而決大議澤被生民功施社稷朝廷方倚
任之隆而先生遂歸田之計正宜享乎餘年又何遽
然長逝嗚呼其可哀也夫其可哀也夫某等後生小
子景仰德誼聊陳薄奠用表微意伏惟尚享

維弘治四年歲次辛亥某月某日門生提學副使馮

蘭馬中錫等謹具香帛緘詞東向再拜昭生乎
尊師古直老先生劉公之靈曰於乎翔于千仞之上
覽德輝而下之者鳳凰時歛而秘時顯而彰其生也
有自其出也有爲不依棲於虛托之陋不爭食於鷄
鶩之場鳴諧律呂道合陰陽維食何食瓊枝琳琅維
止何止梧桐高岡視飢爲之嚇彼鷹隼若將兔而遠
舉高揚斯其天精地靈實爲之孕毓又何凡品群羽
足與之較量燭照數計執匹孰當我儀圖之其惟壽
光膏腴探六經之蘊臬量度闕萬頃之汪洋榮祿則
參校而玉署際遇則君明而臣良經帷啓沃首肯

憲皇陰福橫目膏澤其靈
能通治道笙簧蓋天下方將注目快翻於朝陽之表
而先生乃倦飛知速於積石之鄉人或謂知止其庶
乎不辱而先生則自以爲弱臂其可以挽強空天一
舉六翮輕颺雖雖其聲笑世態區區之易與翻翻其
羽念天恩蕩蕩之難忘既而舞斥鷃而叫鶴鶴鳴
鷓鴣而嬉鴛鴦有雀穿屋維鷓在梁於乎鳳兮埋光
而鏗彩彼何爲者既頡而且頽天下之學子晉者不
知其幾何又將登臺吹笙日引領而惟夫子之是望
其質質而不知所之者顧不能一援手而與我同一

延竚乎榭隅但迂踈痴想而尤拳拳我 聖天子每
為之日夜而皇皇胡爲鄙蝸甲蟬蛻而遽謝乎丹穴
乃乘風排雲而騰羽奮翼乎洪荒山川慘淡草木淒
涼三台奪彩大厦摧床老成動 九重之念藩垣懷
萬夫之防木衮碎登山之齒駝峯倒邀月之觴海岳
英靈千年一覽見文章光焰萬丈空長於乎天子吾輩
昔也破吝摧驕借夫子之椎鑿而今則沾襟揮涕哭
夫子於門墻情關終古人各一方於乎人孰不死死
貴名香如先生者生有益於時沒可傳於後蓋將起
死而復生者於萬萬又何遺恨之相妨於乎白綿漬
酒茅以是將託辭憫鳳情切衷腸是蓋哭吾道之行
也之止也一命也而非若兒女子輩屑屑乎灑淚於
尋常於主哀哉尚享

維嘉靖元年歲次壬午六月二十七日知壽光晚生
孫峻等敢告于

文和公劉者先生之靈曰嗚呼天挺真才以康國脉
於昭文和降神昴宿惟公富經天緯地之學抱忠亮
明允之德受知 先皇而論道師席幾乎二十年之
久大行所學而保合太和培茲數百年之極都俞吁
咈真古人格心之事業彌綸來贊到于今錫時之五

福其渾厚與頽其文章華國勳名字鬼鬼之鼎彝事
業乎煌煌之竹帛誠天民之先覺近古之道伯也今
其殊功食報作善降祥大慶所鍾異材間出銀黃交
映朱紫滿門葩翹穎脫鍾光前之才俊高文大冊掌
再世之絲綸此在今古宰相中比論福德倒指而不
易得者也先生皆有之矣洋洋水之濱東山之岑拱秀
千里擴慶無垠其先生萬歲千秋魂魄來游之地乎
峻自草野而入國門已知先生之德業久矣豈必令
先生之邦入先生之里而後知先生哉采采水藻瞻
拜心堂斯文未喪真魂洋洋先生其有知乎尚享

刑部尚書林俊祭文

嘉靖癸未六月癸卯後學元素子林俊謹托吾文都
憲陳公文鳴代致薄奠遣祭于

太保文和公古直劉先生之靈惟公嶽氣星精人豪
天挺奮志命詞蘇黃董等人文翊贊弘闡大猷總方
開德滋至天休內脩外防默主選中帝曰師臣改
容目送妖僧孽寺傳術邪肆興土木道路咨嗟不
揆躁狂虎口饒肉宸怒上干萬領俱縮詔獄斯
下公取獨爭且讀且賀天皇聖明魁錄惟伍已乃
薄謫嗚吠信信我公為敵星象示變揭開直言讜詞

正論威端爲吞維時渠奸魄膽喪失黨附橫從詆公
益力碧山不負造物胡尤天空鳥倦某水某丘
孝皇山震有虛前席安車來迎逝焉以息立孤寡和
知己爲難春明門外海闊天寬白馬素車疇情蘊結
宿草一觴愁腸割裂尚享

嘉靖二年歲次癸未十二月丁酉資政大夫刑部尚
書眷晚生趙鑑謹以剛鬣柔毛庶口清酌之真敢昭
告于

光祿大夫柱國太保尚書兼大學士謚文和姻伯
公神位前曰猗先生之孕秀乃實泰岳之精靈

鄴之家世兮協後先而彬彬心休休而自裕兮量恢
恢其含弘志蹇蹇而弗渝兮氣浩浩而內充德純粹
而光大兮才超拔而偉雄乘清時以騰躍兮旋陟位
于三公荷宸心之簡在兮日左右乎帝躬履
朝以執政兮位特加而荐崇臨大事以裁決兮
立而刃解斥奸權以被忌兮節提然弗改國祚賴
以不挫兮天下仰其風采矧功成而名著兮以盛滿
而自戒屢抗疏而請老兮勇乎其不可留降溫詔以
褒慰兮溥恩禮而特優遂雅志而忻然兮指故鄉以
歸休意逍遙乎宮壤兮啓華堂于別墅效菽水以承

歡兮攬烟霞而作主厭塵世而觀化兮騎箕尾以登
仙肆訃音其上聞兮軫 聖意之惕然受錫謚而錫
祀兮見終始之克全維譽望之籍甚兮歲既久而猶
傳有箴纓其奕奕兮衍書香於後賢奇勳可述兮先
示簡編昭賢有祀兮俎豆永延愚也生晚兮世姻忝
叨荷公素誨兮官今六曹便道拜祀兮實維其遭我
心孔傷兮公神式昭尚享

致仕太子太保戶部尚書兼謹身殿大學士贈

太保謚文和劉公墓誌銘

弘治二年春三月六日致仕太子太保戶部尚書兼
謹身殿大學士劉公卒于家禮部以口聞上深嗟悼
遣官祭於太保謚文和以是年十一月六日死于
先塋之陽其子鈔衰經詣濟商泣血奉狀請曰先人
有遺言誌吾墓者必托吾同仁兄焉呼公知我者以
是命我我雖不文何忍辭按狀公諱璠字叔溫別號
古直世居青之壽光洋河社高曾以來世系之詳已
載厥考松溪先生墓碑公生而穎悟氣識豪邁甫五

歲時有一老人相曰是兒面有紋類丞字後必爲相
八歲能文過目輒成誦正統甲子科公年十九以壁
經赴省闈道經臨淄適河水泛溢僕馬俱溺公水行
半里餘神色自若人大以爲異既而果高第乙丑會
試弗利卒業成均大司成本公時勉喜其才思敏捷
每試居優等登戊辰彭時榜進士選入翰林進學改
庶吉士鄉先達許道中先生嘗謂人曰此子文有氣
焰異時必爲社稷臣己丑授翰林編脩景泰丙午陞
脩撰天順丁丑陞春坊中允日侍 青宮分番進講
上而天命精微下而問閭疾苦與夫前代治忽之由

貴戚專擅之漸懇懇詳言無少忌諱甲申 憲宗嗣

位以宮僚舊臣陞太常寺少卿兼侍讀成化丁亥預

脩 英廟實錄成陞本寺卿仍兼舊職明年陞兼侍

讀學士一日聞母遘疾上章乞歸省 詔許馳驛以

往 賜白金楮幣抵家母喜其歸疾愈越辛卯竟以

宿疾卒 上賜葬祭公哀毀踰禮廬於墓側鄉人爲

之感化號其里曰仁孝服闋後職甲午陞吏部左侍

郎猶與 經筵公在部事無鉅細必揆諸所學以公

不以情亦不爲苛細矯激之行士論偉之乙未陞兼

翰林學士擢入內閣公既受 命益勉修輔凡軍國

大事獨能果斷無首鼠退後之疑謀有批鱗直前之
勇氣入則告其君出則不使人知天下陰受其惠
者多矣至於大制作多付於公公授筆立就略不構
思而曲盡其情屢稱上意由是寵命愈加賜賚稠
疊丁酉陞戶部尚書兼職如故戊戌加太子少保兼
文淵閣大學士壬寅纂脩文華大訓成陞今職進階
光祿大夫柱國會祖考三代贈封如其官祖妣及妣
并妻俱贈封一品夫人乙巳妖人李孜省輩以左道
亂政動搖國本公獨毅然抗言邪謀遂沮宗社賴
以奠安是年九月公以疾兼念親老乞歸上允其

請賜璽書金幣金織龍衣給驛以還仍命有司月
給食米五石歲撥人夫八名優禮之隆實出異數公
既歸奉養松溪先生備至優游林泉父子兄弟天倫
之樂世無與儷松溪先生一年卒予往弔之無幾公
酬往弔之禮來濟南逮執手言別方將以後會爲期
孰謂天不憖遺而遂永訣天實爲之謂之何哉公嘗
一典春闈試三讀進士卷人咸服其精鑒平生爲文
理完而氣正善行草尤善吟咏有文集若干卷藏于
家生於宣德丙午五月二十五日春秋六十有五配
張氏繼配馬氏子男六長鈞授禮部司務鈺卒鈺登

庚午鄉薦與公同月卒張出也執

恩授中書舍人

錦銓尚幼女一潔貞為出也孫男三人澄南源甫凍甫嗚呼天地間有正氣焉日月以之而光照海岳以之而流峙在人則為忠臣為孝子人雖歿其氣則千載猶生公之為子則顯親揚名克盡其孝為臣則引君當道克盡其忠是以人主察其深誠天下仰其大誼鬼神錄其陰功史冊炳其偉績身雖歿而名永存焉是宜銘銘曰公之文章玉振金聲如威英韶濩公之相業孤忠大節如姚宋房杜履道德之坦途闢仁義之正路天下望其風采縉紳遵其矩度扶前星於

顛危殄氛侵於陰沍屹中流之砥柱障狂瀾於東浙惟正直之是持雖擯棄而不顧時雖晦丙吉之功天必啓 聖明之悟感故人之見知託予文以誌慕忍

技泣而鑄詞繫千載之哀慕

致仕吏部尚書濟南尹曼撰文
太常寺少卿兼翰林院侍講學士長沙李東陽兼蓋
太僕寺少卿直內閣永嘉姜立綱書丹

明故光祿大夫柱國太子太保戶部尚書兼謹
身殿大學士致仕贈太保諡文和劉公神道碑

銘

成化乙巳九月太子太保戶部尚書兼謹身殿大學士壽光劉公上章乞致仕 憲宗皇帝以公爲舊學之臣重違其志乃 賜璽書令馳驛歸命有司月給米歲給僕夫贍用 恩禮甚厚也公既歸六年爲弘治庚戌三月六日以疾卒享年六十五其孤銳幼而知禮來告于 朝詔贈太保謚文和仍命有司祭葬如制銳復奉其父門生董少卿尚矩狀來求予文樹石墓道予幸嘗從公同在詞林又同侍 憲宗皇帝于青宮相知既久義有不可辭者公諱翔字叔温自號古直姓劉氏其先下邳人也元有爲總管稱八公

者避亂徙青州壽光之洋河里故今爲壽光人曾祖讓祖良佐贈太子太保戶部尚書兼謹身殿大學士父昂封如之曾祖妣彭氏祖妣郝氏妣李氏並贈一品夫人公生有異質穎敏絕倫幼從故禮部侍郎寧陽許公學爲文多奇氣入晉稱之年十九中山東鄉試明年會試禮部不偶卒業太學與今吏部尚書三原王公及前禮部侍郎襄陵邢公同舍學業刻苦志操卓然大爲祭酒李先生所器重正統戊辰竟登進士第改翰林庶吉士初授編修歷修撰天順初陞右

造語圓融者為成家外是
則迂僻則虛謬則險恠不
足尚也惟公得于天者聰
豁正直脩于己者嚴密精
明故其為文立意也叙事
也造語也不異乎作者之
論與之所到筆不能闕而

無毫髮點綴呻吟之病學者仰其雄渾博悉可謂卓
然成家者矣蓋與漢董仲舒唐韓退之宋司馬君實
之文思理有深契焉用之
家庭則益乎人倫用之邦
國則補乎風化用之郊廟

